

Jü Carta San Pablota Títotau Ä Jiojtekähui

Teboteri

¹ Pablo Diosta saulero éntok Jesucristota apóstol, jume áapörík yeu púari Diostat ehuápámani, entok jü lúturiata täyahuäpo jum emo jiokölihuä pámani.

² Jum jita jíba boobít-huäpo yü jíapsihuäpo. Jum Diosta kaa yore baytähuäpo, yore ä mak-rokkak, kee jee ániata yeu machiay náateka.

³ Éntok taahuata yúmak ä täyatebok juka ä nooki, jume huatemmeu ä nokhuä pámani, ìri ín mampo tojri Diosta itom jínëukamta nésaupo.

⁴ Títotahui, Cristota súalhuäpo tua ín üusi, Diosta tü eäu, yore nak jiokölihuame, éntok yánti jíapsihuame, Dios Áchayta entok Señor Jesucristota itom jinëukamta bétana.

Jume pastorim entok obispom jachin ministerio tékilta bem yánakëhui

⁵ Iäri béchibone isla Cretapo enchi tö siika, hua kaa tüisi huenta enchi rútuaktianaké béchibo, éntok síme buere joarammet pastorim enchi joa iaaka, nesauta enchi ín makakä pámani.

⁶ Ìri, jü kaa turik bétana kaita át nok máchina, huépulak jíba jubnake, entok Diosta

súaleme üusinake, kaa turik bem joa bétanam
kaa natuatunake entok bem éäpo jíba
jíapsihuäpo.

⁷ Bueituk úttea, jü obispo kaa türik bétana
kaita at nok machiná Diosta tékil ä joapo kaa au
buérialinake, kaa juënaratunake, kaa vino
jilérotunake, kaa nássuäratunake, tómita kaa
türik bétana huentta kaa úkulnake.

⁸ Al-la ä joapo ára huatem mabetnake,
tühuata naknake, éntok suámsi au núnake,
lútula jíapsinake, santosi jíapsinake, ä
jíapsäpo áapo au yüeka au yekanake,

⁹ ára áamak ä tahuarianake juka nok
lutüriata, ä majtíahuaka pámani, entok ket ára
ámeu noknákë, yore majtihuäpo kayta täbuiasi
jípureka, éntok jume ä nok bėjreka nokame
ahuä temajtuaka ä tü etuana, jünehuamta am
maknake.

¹⁰ Bueituk ketunem juebénaka aane, jume
lütüriata nok bėj-reme, jume kia jájana jítat
nokame, entok yore baytahuame, entok chë
junne jume circuncisiónta hueriame.

¹¹ Úttea huamei tem páttiabéchibo; bueituk
sime joamim jíapsi násonte kaa tühuata am
majtíaka, ikäi joakam tómita yún koba báare.

¹² Senu áme násuk profeeta ínel jiaahua:
“Jume cretapo joomem jíbam ára nókichi,
animal kaa susuäram bénasim maachi,
jibuäram, obëram.”

¹³ İri ä nokäu lütüria. Juari béchibo, kuttilasë
ámeu nooka, juka Diostat ehuamta türik am
jípunakë béchibo,

¹⁴ kaa jume judíom cuentommet suánake, éntok huame yorémem nesauriachi, bueítukim lútüriata omoute.

¹⁵ Sime chïcha machirata kaa jipure, jume chïcha machirata kaa jipureme béchïbo, të huame jíapsi nasontulataka kaita súaleme béchïbo, sime chïcha maachi; bueítuk jü bem éeri éntok jíapsi suära nasóntula.

¹⁶ Diostam emo täya tíiya, të hua bem jita jóäubeyim ä omoute. Kujti machirata jípureka, Diosta bej-rekam jíapsa, jita türik júne kara joaka.

2

Jü lútüriata yore majtihuame

¹ Të empo Akë ä nooka juka kaa täbuiasi huemta yore majtihuamta.

² Jume yoiyöturim yúmalasim suamsi emo núnake, kaa yún nokaka, suamsi, emo yörihuäpo tülisi, Diostat ehuäpo kaa täbuiasi, emo nakhuäpo, entok ára jita böbithuäpo. Jiapsina, áma yeu huée béchïbo, jum kaa tühuapo.

³ Ínëli jume jamyóyölam, bem jíapsäpom yörisi machisi emo núnake, kaabetat kia nokaka, vino jïhuame kaa am yuínake, tühuatam ára majtianake;

⁴ jume jáamuchim chë kaa yoiyöhuemim majtianake, bem kunam am náknakë béchïbo, éntok bem asoam,

⁵ entokim suamsi emo nüyeka, kayta kaa türik joaka, bem joam am suayanakë béchïbo,

tü jíapsitam jípunake, bem kunam bétukim
emo am núnakë béchïbo, bueítuk Diosta
nokibet bette nokta kaa ä bétana noknä
béchïbo.

⁶ Alë bénasi kétchi, jume jübua yoiyötume
kuttilasë ámeu nooka: suamsi emo am nü
sáhueka;

⁷ símepë bat emo ketcha ejemplopo, tekilpo
türík joaka, yore majtياهوäpo, yúmalasë emo
bittebo, entok suamsi,

⁸ nokta türípo entok kara omouteta, bueítuk
jü ä béj-reka huéme ä tiunakë béchïbo, entok
kaita juénak enchim bétana nok machik
jípureka.

⁹ Éntok jume saulerommehuë kuttílasi nooka,
bem tékom bétukim emo nüunake, símeku am
türeu jonake, katim elaka am nok bejnake;

¹⁰ kabeta baytahuaka jita ä ühuanake, ál-la
símeku ä bitteboka lútula au núnake, bueítuk
símeku jü Diosta bétana yore majtياهوame
itom jínëume üjyorisi bittunake.

¹¹ Bueítuk jü Diosta tü eäu áu bittebo, síme
yoremem jínëuriata makbareka,

¹² itom majtiaka, juka Diosta kaa yörihuau
tojaka, éntok juka ániapo kaa türík
úkulhuamta, juéna éerita tójaka, ímíte
jíapsinake suamsi, lútula entok Dios huáateka,

¹³ juka tüisi al-lehuäpo mabet-báahuamta
boobíchaka, entok ujyorisi au yeu
machirianakeme jü buere Dios, éntok Jesucristo
itom jínëukamta,

¹⁴ jü ito béchïbo au tojakame, síme kaa türíku
itom jínëu báreka, éntok tossaala itom

báksiaka ä pueblo attiapo itom jípu báreka, éntok tü tékilta johuäpo naybuk-riata jípureka.

¹⁵ Íkäre ámeu nooka, kuttílasí éntoke yäura úttiata jípureka kaa türi bem yáari am toij sauhue. Kaabe kaa kia kaitäpo enchi jipunake.

3

Lútula jípsi jipuhuame Diosta tü eäpo

¹ Amëhue am huatisauhue, jume gobierno tékilta jipureme entok yäuram nesahueme áme bétuk emo am jípunakë béchïbo, nesautam jonake entokim at jiapseka tékilta jonake.

² Kaabetachim juënak noknake, katim nássuäleromtunake, ál-lam huatemmakim túlisi emo jipunake, simë yanti ehuamta bittteboka síme yoremem bíchäpo.

³ Bueítuk ítapo ket bannaataka kaa susuakay, katte Diosta nésaupo rejtey, chikturataka, síme juëna éerita bétuk ito jípureka. Kaa tühuapote jíápsay, éntok jita ito nat úkuleka, kaa bibit péehuaka, éntok huatem kaa bibit péaka.

⁴ Të juka Dios itom jínëukamta tü ehuamta itou yeu machiako, éntok síme yoremem ä nákéhui,

⁵ itom jínëuk, kaa lútula huëpo tuhuata itom yáakä béchïbo, ál-la itom ä nak jiokolëpo, bajsiahuaka bemélasí tomtihuäpo, entok Espíritu Santopo bemélasí ä yahuakapo.

⁶ Jü, buéresi yüni itot ä chíbejtiakähui, Jesucristo itom jínëukamta bétana,

⁷ bueituk lútula jíapsihuaamta ä tü eäpo jípureka, amakte herenciata jípureka tahua, yü jíapsihuaamta itom boobichä pámani.

⁸ Īri nooki huitti lütüria, Íachiri katë kom eaka, kutti am téjhua, bueituk jume Diosta súaleme tü tekilpom jíba emo jipunake. Ímëri türimme, éntok yoremem ania.

⁹ Të juka nokta kaa nau bataka huetma katë ä jikkaijbáare, entok juka nat tomti kat-huaamta bétana kia nokhuaamta, entok juka leyta bétana nau nok nássuahuamta, bueituk kia bejja entok kaitapo yore ania.

¹⁰ Jü yoreme emo näikimtehuaamta joamta, séjtuli entok guosa kuttílasi áu noksuka, pakunë yä tahuaria.

¹¹ Juneate hua ínëli áu nasontekame, Diosta bejre, entok bette noki at chuppe, juka bette nokta at chupe béchïbo.

Jíta ä yánakeu bétana au nokak

¹² Artemasta ö Tíquicota émou nee bíttuako. Emo bamijtuaka pueblo Nicópolis inou yepsa, bueituk júmüne, síme séberia tiempopo tahua báreka eiya.

¹³ Jü Zénas leyta yúmalasi täyame éntok Apoolojta, al-leake am boo tojja, kayta ámeu bïnakë béchïbo.

¹⁴ Jume itomak aanim am áraunakë béchïbo, jum tü tékilta johuäpo. Bueituk jume jíta ámeu bëyemmehui am anianakë béchïbo; bueitukim ínëli huatem tuhuata joorianake.

Teboteri éntok ä chupëpo Diosta tü eähui

15 Sime jume ínomak aneme enchim tebotua.
Jume Diostat ehuäpo itom nakemë tebotua,
Diosta tü eäu enchimmaktunake. Júnentunake.

Mayo

Mayo: Diosta nooki yorem nokpo New Testament

copyright © 2014 Wycliffe Bible Translators, Inc.

Language: Mayo

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 11 Jun 2026 from source
files dated 13 May 2025

84020f7b-8f34-5f65-803f-a2c6c92b92ea